

ած կերպարանքները բերում են անցորդի վրայ զարհուրանք, միեւնոյն ժամանակ լցնելով նրա սիրտը մի պատկառելի երկիւղածութեամբ դէպի մեծ աստուածուհու վեհութիւնը, որ ցոյց էր տոնել իր նշանները այն թշուառների վրայ:

Երբ մենք անցնում էինք «խեղճերի» միջով, մի պատանի, մաշոած եւ գունաթափ երեսով, գեղեցիկ երկնագոյն աչքերով, եւ շէկ-մետաքսանման մազերով, վեր թռաւ տեղից եւ գրկեց ինձ, ասելով.

– Ֆարհատ, ես վախում եմ դրանցից...

Պատանին ցոյց տոնեց «խեղճերին», որոնց կարգում նստացրել էին եւ իրան:

Ես ճանաչեցի. նա տէր Թողիկի որդին՝ Ստեփանն էր:

Մինչեւ իմ խօսելը, շուտ վրայ հասաւ արեղաներից մէկը, որ կանգնած «խեղճերի» մօտ պատմում էր անցորդներին, թէ նրանցից իւրաքանչիւրն ինչ յանցանքի համար ենթարկուած էր տիրամօր պատժին: Աբեղան, ինձանից հեռացնելով Ստեփանին, ստիպեց նստել իր տեղը: Պատանին ողորմելի կերպով նայեց մեզ վրայ եւ գլուխը քարշ գցեց: Խեղճ տղայ, ընտանիքը, որ անբախտացրել էր նրան, բաւական չէր, որ չէր զգում իր բարբարոսութիւնը, այժմ բոլորովին դուրս էր գցել թշուառ զոհին իր միջից :

Մենք մտանք վանքի մէջ: Այստեղ տաճարի սուրբ սեղանի վրայ կարգով շարած էին՝ արծաթի եւ ոսկու մէջ պատած սրբոց մասունքներ եւ զանազան տեսակ մեծ եւ փոքր խաչեր: Ուխտաւորները հերթով մօտենում էին, համբուրում էին եւ զգում էին նրանց մօտ դրած թասերի մէջ փողեր:

Համբուրելով սուրբ մասունքները, մենք անցանք երկրպագութիւն տալու աստուծոյ մօր գերեզմանին:

Ամէն տեղ դրած են գանձանակի թասերը, որոնց մէջ ուխտաւորները զգում են իրանց նոտրները: Աբեղան, կանգնած գանձանակի թասերի մօտ, պատմում է սրբութիւնների հրաշալի զօրութիւնը, շարժում է ուխտաւորների ջերմեռանդութիւնը, եւ ուժ է տալիս նրանց առատաձեռնութեանը:

Այս բոլորն ինձ վրայ այն տպաւորութիւնը չէր գործում, ինչ որ այժմ գրում եմ. դա վերջին ժամանակներում, շատ տարիներից յետոյ, հին տպաւորութիւնների այլակերպուած արտադրութիւնն է: Իսկ այն ժամանակ ես էլ, նախապաշարմունքներով լի, նոյն սնահաւատ ուխտաւորներից մէկն էի: Ես մինչեւ այսօր չեմ կարող մոռանալ այն ուրախութիւնը, երբ Մարօն, տալով ինձ Մարգարիտի ձեռքը, ասաց.

– Հիմա համբուրոնցքէ եւ քոյր-եղբայր դարձէք: